

RESOLUCIÓN POLA QUE SE AUTORIZA O PLAN EXPERIMENTAL DE PESCA CON NASA PARA PEIXES PARA A TEMPADA 2023.

ANTECEDENTES

A Federación de Confrarías de Pescadores de Pontevedra solicita, con data do 29 de decembro de 2022, un novo plan de pesca experimental coa arte de **nasa para peixes** para a tempada 2023. Así mesmo, as confrarías de pescadores de Ribeira e de Corcubión, en escritos de datas do 21 de decembro de 2022 e do 20 de xaneiro de 2023 respectivamente, achegan solicitudes de incorporación de embarcacións ao presente Plan.

Dentro do procedemento para a aprobación do plan experimental de pesca, solicitouse o informe técnico correspondente.

FUNDAMENTOS TÉCNICOS E XURÍDICOS

A nasa para peixes ven regulada nos artigos 84 a 88 do Decreto 15/2011, do 28 de xaneiro, polo que se regulan as artes, aparellos, útiles, equipamentos e técnicas permitidos para a extracción profesional dos recursos mariños vivos en augas de competencia da Comunidade Autónoma de Galicia.

Segundo o establecido no artigo 3.3 do citado Decreto, autorizarase o uso de artes, aparellos, útiles, equipamentos e técnicas diferentes aos regulados neste decreto mediante plans experimentais. Así mesmo, a disposición transitoria terceira establece: *os plans experimentais referidos no artigo 3.3 deste decreto manteñen a regulación prevista no artigo 3 bis do Regulamento da actividade pesqueira e das artes e aparellos de pesca permisibles en Galicia, aprobado polo Decreto 424/1993, do 17 de decembro, ata que non se aprobe a norma que o substitúa.*

A tenencia a bordo e a utilización de nasas dirixidas á captura de peixe están prohibidas en augas exteriores, segundo establece o artigo 35.4 do Real Decreto 502/2022, do 27 de xuño, polo que se regula o exercicio da pesca nos caladoiros nacionais.



Non obstante, segundo o artigo 88 do dito Decreto 15/2011, do 28 de xaneiro, as embarcacións que as tiveran autorizadas no momento da súa entrada en vigor poderán continuar coa súa actividade durante a súa vida útil.

De conformidade co disposto no artigo 81.2 do Decreto 15/2011, o conxunto das caceas non poderá superar os 3.000 metros de lonxitude por embarcación.

A proposta do Plan presentado pola Federación Provincial de Confrarías de Pontevedra presenta unha redución con respecto á cantidade máxima de nasas a utilizar, en relación ao total que lle permitiría o artigo 85 do Decreto 15/2011, do 28 de xaneiro.

A faneca non ten talla mínima fóra de augas de competencia autonómica, mentres que na nosa comunidade a talla mínima está establecida en 15 cm.

A nasa para peixes é unha arte moi efectiva en canto á biomasa capturada. En canto á selectividade a porcentaxe de individuos de talla inferior á mínima legal é de un 15% para o conxunto de especies comerciais, polo que para poder autorizar o seu uso deberán establecerse medidas que reduzan o esforzo pesqueiro.

Tendo en conta o exposto, e vistos os informes técnicos, esta Consellería,

RESOLVE:

Aprobar o plan de pesca experimental con ***nasa para peixes*** solicitado pola Federación de Confrarías de Pescadores de Pontevedra, baixo os seguintes termos e condicións:

1. Participantes

- a) Unicamente participarán no plan as embarcacións que se relacionan no **anexo A** da presente Resolución.
- b) **Non** se incorporarán embarcacións nos plans aprobados para a seguinte campaña, nos seguintes supostos:
 - Cando estando despachadas ao plan en curso, non presentaran a declaración de capturas mensual, conforme ao establecido na presente



Resolución, e non se conte con elas para a elaboración dos informes de seguimento do mesmo.

- Cando non estando despachadas ao plan en curso, presenten declaración de capturas ao plan.

Nestes casos, as embarcacións non poderán ser incluídas en todo o período autorizado do plan da seguinte campaña, áínda que levan a cabo a solicitude de incorporación ao mesmo.

- c) As embarcacións excluídas no presente plan quedan relacionadas no **anexo B**.

2. Arte

A arte a utilizar é a **nasa para peixes**, que deberá ter as seguintes características técnicas:

- a) A nasa para peixes está formada por un armazón de forma cilíndrica, con aros metálicos circulares e varelas verticais. Ten dúas entradas ou bocas opostas feitas de rede, que se prolongan de forma troncocónica cara ao interior da nasa. O recubrimento da nasa será de rede.
- b) Os aros metálicos circulares terán un diámetro máximo de 2 metros.
- c) As varelas verticais, ou altura da nasa para peixe, serán como máximo de 800 milímetros.
- d) A dimensión de malla mínima será de 60 milímetros.

O número máximo de nasas para peixes permitido será de **45**, independentemente do tamaño da embarcación. A lonxitude máxima da arte será de **3.000 metros**.

3. Balizamento

As artes deberán estar convenientemente balizadas, segundo a normativa vixente.

4. Identificación

Deberán conter nas boias, de ámbolos dous extremos das diferentes caceas, o folio e máis a matrícula da embarcación, así como o nome da arte "**N**" (nasas).



5. Período

O período autorizado abrangue dende o día seguinte á recepción desta Resolución ata o 31 de decembro de 2023.

6. Horario

A utilización da nasa para peixe será diúrna. O horario de traballo será desde as 07.00 horas ata as 17.00 horas durante todo o ano.

7. Especies

As especies obxecto da captura serán a **faneca** e acompañantes que deben estar en época de extracción e superar a talla mínima. No caso da faneca serían 15 centímetros.

8. Réxime de calamento e zonas de traballo

As nasas para peixes deberán ser levantadas e levadas a porto diariamente.

O seu uso só será autorizado en fondos superiores aos 30 metros de profundidade e por fóra dos límites do Parque Nacional das Illas Atlánticas.

A zona de traballo coa nasa para peixe será sempre por fóra das liñas do Anexo I establecidas no citado Decreto 15/2011, do 28 de xaneiro. Non obstante, dende Cabo Corrubedo ata cabo Silleiro, no período comprendido entre o 1 de abril e o 30 de setembro, calaranse por fóra da liña que une as illas de Sagres, Sálvora, Ons, Onza, Cíes, Agoeiro e Carallóns co cabo Silleiro, ata a liña de base recta establecida no Real Decreto 2510/1977, do 5 de agosto, sobre trazado de liñas de base rectas en desenvolvemento da Lei 20/1967, do 8 de abril, sobre extensión das augas xurisdicionais españolas a 12 millas, a efectos de pesca.

9. Puntos de control e venda

Zonas de pesca, portos, centros de descarga, lonxas e centros de venda autorizados.



10. Control e seguimento da actividade pesqueira

- a) **Despachos telemáticos.** As embarcacións relacionadas no **anexo A**, cando faenen acolléndose ao Plan, deberán despachar no apartado de adhesión a plan de explotación: ["NASA PEIXES (15G) PLAN EXPERIMENTAL NASA PARA PEIXES 2023 (FEDERACIÓN PROVINCIAL DE CONFRARÍAS DE PESCADORES DE PONTEVEDRA)"]. Polo tanto, as embarcacións que despachen a un **plan de explotación** só poderán faenar no mesmo día no ámbito do correspondente plan, e non poderán usar ningunha outra arte que teñan no seu permiso de explotación.

Por outra banda, advírtese que, ao remate da vixencia deste plan, se non se realiza un novo rexistro de actividade pesqueira, a embarcación pasaría á situación de "**pendente rexistro actividade**".

- b) **Remisión de datos de capturas.** Con periodicidade mensual as confrarías deberán remitir datos de extracción por especie, utilizando o modelo do **anexo C** que se acompaña, ao Servizo de Pesca da Dirección Xeral de Pesca, Acuicultura e Innovación Tecnolóxica, ao enderezo serviciopesca@xunta.gal. A non inclusión de datos dalgúnha das embarcacións no período estipulado terá como consecuencia a súa baixa definitiva do plan.
- c) **Mostraxes.** Durante o período de vixencia do plan, técnicos da Consellería poderán realizar en calquera das embarcacións autorizadas, mostraxes para control, seguimento e avaliación do plan. Así, os armadores deben colaborar de tal xeito que se permitan acadar os obxectivos propostos. A falta de colaboración neste eido ocasionará a baixa definitiva do plan.

11. Extracción e comercialización

O exercicio da actividade extractiva e comercial establecida neste plan está sometida ao estrito cumprimento da normativa vixente en materia de extracción e comercialización de produtos da pesca fresca.

12. Infraccións e sancións

O incumprimento das condicións establecidas neste plan, poderá ser sancionado segundo o establecido na Lei 11/2008, do 3 de decembro, de pesca de Galicia, modificada pola Lei 6/2009, do 11 de decembro.



Contra esta resolución, que esgota a vía administrativa, poderá interpoñerse recurso de reposición no prazo dun mes, contado dende o día seguinte ao da súa notificación, ante a conselleira do Mar, de conformidade co disposto nos artigos 123 e 124 da Lei 39/2015, do 1 de outubro, do procedemento administrativo común das administracións públicas.

A conselleira do Mar

P.D. Orde do 21-02-2022 (DOG n.º 41, 01-03-2022)

O director xeral de Pesca, Acuicultura e Innovación Tecnolóxica

Antonio Basanta Fernández



ANEXO A

RELACIÓN DE EMBARCACIÓNIS INCLUÍDAS NO PLAN DE PESCA CON NASA PARA PEIXES

PERÍODO: **2023**

EMBARCACIÓN	MATRÍCULA E FOLIO	CONFRARÍA
ARLANZA CUATRO	VI-4-1-98	MOAÑA
DABRÁN	VILL-4-3-97	BUEU
GOLFO PÉRSICO	CO-5-02-94	CORCUBIÓN
MAR NOVO DOS	VI-4-5731	BAIONA
MARI-FLORA	VI-3-1899	BUEU
MERCHE	VILL-1-4723	RIBEIRA
NOETA PRIMERO	CO-5-03-01	CORCUBIÓN
NOJUAL	VILL-1-1-92	RIBEIRA
NUEVO CIGALA	VI-3-10-05	BUEU
NUEVO SANTA ROSA	CO-7-7-97	RIBEIRA
O AUDAZ	VI-3-1-11	BUEU
O MORIÑO	VILL-1-4711	RIBEIRA
SEGUNDO TORO	CO-5-02-92	CORCUBIÓN
VIRXE DOS MARES	VI-3-4-09	BUEU



ANEXO C

DECLARACIÓN DE CAPTURAS DE EMBARCACIONES

NOME DO PLAN: _____

ANO: _____

MES: _____

HORARIO: _____

- (1) A CUBRIR UNICAMENTE NAQUELES PLANS NOS QUE SE EMPREGA ESTA ARTE.
(2) CANDO UNHA EMBARCACIÓN CAPTURE VARIAS ESPECIES NO MESMO MES DEBERÁ CUBRIRSE UNHA CASILLERIA POR CADA ESPECIE.

